



Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00503 pillugu sisamanngornermi ulloq 11. november 2010-mi aalajangiineranik Naalakkersuisunut ilisimatitsineq.

Kontomut pingaarnermut 51.02.03-mut, Puisit amiinik tunisinermi tapiissutitut tunngasumut, 2010-mi ilassutitut aningaasaliissuteqarnissamik qinnuteqaat

Naalakkersuisut **inassutigaaat**,

- kontomi pingaarnermi 51.02.03-mi, Puisit amiinik tunisinermi tapiissutitut tunngasumi, aningaasaliissutit 1,5 mio. kr.-inik amerlineqassasut, aamma
- kontomi pingaarnermi 20.05.31-imi, kommunini aningaasartuutaanerusussanut immikkoortitanut tunngasumi, aningaasaliissutit 1,5 mio. kr.-ini ikilineqassasut.

Aningaasaqarnermut Ataatsimiititaliap oqaaseqaatai

Puisit amiinik tunisineq 22. oktober matuneqarpoq, tassa piffissamut tunisassatut aalajangiusat tamakkerneqarmata. Puisit amiinik tunisinerup novemberip qaammataanut ammaqpinneqarnissaa siunertaralugu puisit amiinik tunisinermut tapiissutitut aningaasaliissutit amerlineqarnissaat Naalakkersuisut suliami matumani qinnutigaaat.

Suliassaqarfimmi tassani pilersaarutininik nutaanik ullutsinnullu naleqquttunik pisariaqartitsisoqartoq aningaasaliissutininik qaffaanikkut tassuuna ersarissumik takutinneqaqqittoq Aningaasaqarnermut Ataatsimiititaliaq isumaqarpoq. Akit maannatut appasitsigitillugit pisortanit annertuumik tapiiffigineqarani puisit amiinik tunisineq ingerlanneqarsinnaanngitsoq ataatsimiititaliamit nassuerutigineqaraluartoq tunngaviummik isigalugu ataatsimiititaliaq isumaqarpoq suliassaqarfiup tamatuma aningaasaqarnikkut imminut napatinnerusumik ingerlanneqarnissaa Naalakkersuisunit sulissutigineqartariaqartoq.

Nunatta Ammeriviata siunissamut periarfissaanik misissueqqissaarnissaq siunertaralugu suleqatigiissitap siusinnerusukkut pilersinneqartup suliaminik kaammattuutiminillu piaartumik saqqummiussinissaata ersarissumik pisariaqartinneqarneratut suliaq una ataatsimiititaliamit isigineqarpoq. Tassunga atatillugu isumaginninnikkut suliffeqarnikkullu isiginiagassat naapertuunnerusumik immikkoortinneqarnissaannut suleqatigiissitap kaammattuutai peqataaqataajumaartut neriuutigigini ataatsimiititaliap oqaatigissavaa.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit **akuerineqarput.**

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliap siulittaasua